



Bosnia and Herzegovina
Federation of Bosnia and Herzegovina

CANTON SARAJEVO
Government

Broj: 02-04-11436-1/21
Sarajevo, 22.03.2021. godine

Zastupnicima Skupštine Kantona Sarajevo

PREDMET: Stavovi na amandmane zastupnika i zastupnica u Skupštini Kantona Sarajevo po materijalu koji se nalazi na dnevnom redu XVIII Hitne sjednice Skupštine Kantona Sarajevo

Na **36. vanrednoj** sjednici Vlade Kantona Sarajevo održanoj **22.03.2021.** godine, a u funkciji pripreme XVIII Hitne sjednice Skupštine Kantona Sarajevo, razmatrani su amandmani zastupnika i zastupnica u Skupštini Kantona Sarajevo po materijalu koji se nalazi na dnevnom redu navedene sjednice, i to:

1. Amandmani Kluba SDA u Skupštini Kantona Sarajevo,

Nakon razmatranja amandmana klubova zastupnika i zastupnica u Skupštini Kantona Sarajevo, Vlada Kantona Sarajevo zauzela je sljedeće

S T A V O V E

1. AMANDMANI KLUBA SDA U SKUPŠTINI KANTONA SARAJEVO

1.1. Na Prijedlog Zakona o izmjenama i dopunama Zakona ublažavanju negativnih ekonomskih posljedica i uštedama u Kantonu Sarajevo, podnose sljedeće:

AMANDMAN I

U članu 1

- **stav (5)** da će riječi „znatno otežan rad“ biti precizirane aktom o postupku finansiranja na prijedlog Ministarstva privrede Kantona Sarajevo
- **stav (7)** na prijedlog Ministarstva privrede Kantona Sarajevo, a uz prethodno pribavljeno pisano mišljenje Ministarstva finansija Kantona Sarajevo

U članu 1 (dopuna člana 2) dodaje se stav (9) i glasi:

“Vlada Kantona Sarajevo će osigurati jednokratnu stimulaciju u iznosu od 1.000,00 KM svim zdravstvenim i nezdravstvenim radnicima zaposlenim u zdravstvenim ustanovama koji su bili angažovani u borbi protiv pandemije COVID 19” i dodaje se stav (10) i glasi :

“Vlada Kantona Sarajevo će subvencionirati cijene vrtića u JU Djeca Sarajeva i subvencionirati proizvedene boravke u školama za korisnike koji su bili u izolaciji proporcionalno broju radnih dana u kojem nisu koristili usluge vrtića I proizvedenog boravka”.

U članu 1 (dopuna člana 2) mijenja se stav (5) i glasi:

„Vlada će osigurati finansiranje cijele minimalne mjesečne bruto plaće na nivou FBiH za mjesec u 2021. godini za djelatnosti kojima je rad zabranjen”.
Stav (5) postaje stav (6)

U članu 1 mijenja se stav (6) i glasi:

„Vlada će na prijedlog Ministarstva privrede Kantona Sarajevo najkasnije u roku od deset dana stupanja na snagu ovog zakona donijeti poseban akt o postupku finansiranja iz stava (5) ovog člana kojim će urediti ne samo postupak nego preciznije utvrditi uslove za finansiranje dijela minimalne mjesečne neto plate.“

AMANDMAN II

Član 2. (izmjena člana 10)

Član 10 dodaje se stav (2) i glasi:

“Takse, članarina i naknade iz stava (1) ovog člana neće se plaćati narednih 90 dana od dana stupanja na snagu ovog Zakona”.

AMANDMAN III

Član 3 (Izmjena člana 12)

U Članu 12 stav (4) mijenja se i glasi:

“(4) izuzetno od stava (1) i (2) ovog člana kantonalna ministarstva i resorna kantonalna ministarstva koja u svom resoru imaju potrošačke jedinice mogu donijeti posebnu odluku za svoje ministarstvo i za potrošačke jedinice iz svog resora, a uz prethodnu saglasnost Vlade Kantona Sarajevo, a za samostalne kantonalne uprave, samostalne kantonalne upravne organizacije, stručne i druge službe koje osniva Vlada, odluku može donijeti Vlada”.

AMANDMAN IV

U članu 3 stav (4) brisati „resorna kantonalna ministarstva“, navesti samo „kantonalno ministarstvo“.

Stav predlagača:

Amandmani se ne prihvataju.

O b r a z l o ž e n j e

Svi akti koje Vlada Kantona Sarajevo usvaja moraju sadržavati mišljenje Ministarstva finansija i priloženu izjavu o fiskalnoj procjeni datog akta na Budžet Kantona Sarajevo, s toga nije potrebno da se ovim Zakonom definiše prethodno pribavljeno mišljenje Ministarstva finansija.

Vlada Kantona Sarajevo će posebnim aktom odlučiti o oslobađanju pojedinih kategorija koji se predlažu amandmanima.

**VLADA KANTONA SARAJEVO PODNOSI SLJEDEĆE
AMANDMANE:**

- Na Prijedlog Zakona o izmjenama i dopunama Zakona ublažavanju negativnih ekonomskih posljedica i uštedama u Kantonu Sarajevo, kako slijedi:

AMANDMAN I

Dodaje se novi član 1. koji glasi:

*Član 1.
(Dopuna člana 1.)*

“U Zakonu o ublažavanju negativnih ekonomskih posljedica i uštedama u Kantonu Sarajevo (“Službene novine Kantona Sarajevo”, broj: 18/20 i 46/20), u članu 1. iza riječi “pomoći privrednim subjektima”, dodaju se riječi i “studentima”, a iza riječi “naknade za općekorisne funkcije šuma”, dodaju se riječi “oslobađanje od plaćanja dijela uplate školarine”.

Dosadašnji član 1. postaje član 2.

Obrazloženje:

S obzirom na izmjene koje su predložene u Amandmanu III bilo je potrebno izvršiti dopunu člana 1. na način kako je to navedeno u Amandmanu.

AMANDMAN II

Iza novog člana 2. dodaje se novi član 3. koji glasi:

*„ Član 3.
(Izmjena člana 3.)*

U članu 3. u stavu (6) riječ: „Banke“ mijenja se i glasi : „banaka“ .

Obrazloženje:

Vlada predlaže ovaj Amandman jer smatra da bi izborom više banaka za provođenje kreditne linije postigla se veća efikasnost u realizaciji projekta koji će provesti SERDA u skladu sa Zakonom o javnim nabavkama.

AMANDMAN III

Iza novog člana 3. dodaje se novi član 4. koji glasi:

*“Član 4.
(Član 9a.)*

(Oslobađanje od plaćanja dijela školarine u 2020./2021. godini)

(1) Studente prvog i drugog ciklusa studija, kao i studente integrisanog studija Univerziteta u Sarajevu koji finansiraju svoj studij, a imaju ostvaren prosjek ocjena najmanje 8,00 i položili su sve ispite iz prethodne godine i ne obnavljaju studij u 2020./2021. godini, Kanton Sarajevo u skladu sa ovim zakonom, oslobađa plaćanja dvije trećine školarine za 2020./2021. godine.

(2) Studenti iz stava (1) ovog člana, dužni su preostalu ratu školarine uplatiti do završetka akademske 2020./2021. godine.”

Dosadašnji čl. 2., 3., 4. i 5. postaju čl. 5., 6., 7. i 8.

Obrazloženje:

Polazeći od činjenice da je Kanton Sarajevo iskazao strateško opredjeljenje da podrži i stimuliše ostanak mladih u BiH, a posebno visokoobrazovanih i prespektivnih kadrova koji predstavljaju garanciju izgradnje prosperitetne države BiH, predložena izmjena bi doprinijela ostvarenju tog proklamiranog opredjeljenja.

Vlada Kantona Sarajevo podržava samofinansirajuće studente koji su bili vrijedni i položili sve ispite iz prethodne godine sa prosjekom 8,0 i više prebaci na budžetsko finansiranje.

AMANDMAN IV

U članu 12. iza stava (5) dodaje se novi stav (6) koji glasi:

„Član 6.
(Dopuna člana 12.)

“(6) Izuzetno od stava (5) ovog člana Ministarstvo unutrašnjih poslova Kantona Sarajevo može donositi podzakonske akte koji proizvode dodatne fiskalne efekte na Budžet.”

Obrazloženje:

Pored prethodno dostavljenih izmjena člana 12 stav (4) Zakona, Vlada Kantona Sarajevo predlaže da se predmetni član 12. i dopuni na način kako je to navedeno u Amandmanu IV iz razloga što Ministarstvo unutrašnjih poslova Kantona Sarajevo, odnosno Uprava policije, ima opravdanu potrebu za povećanjem broja izvršilaca (policijskih službenika, državnih službenika i namještenika), što će se utvrditi novim Pravilnikom o unutrašnjoj organizaciji, koji predstavlja podzakonski akt u smislu odredbi Zakona o unutrašnjim poslovima Kantona Sarajevo (“Sl. novine Kantona Sarajevo” br. 1/16, 26/19, 31/19 i 39/20), a za čije donošenje je ovim zakonom određen rok. S tim u vezi, kako je članom 12. stav (5) Zakona o ublažavanju negativnih ekonomskih posljedica i uštedama u Kantonu Sarajevo (“Sl. novine Kantona Sarajevo”, br. 18/20 i 46/20), propisano da se odgađa donošenje propisa iz nadležnosti Kantona koji proizvode dodatne fiskalne efekte na Budžet, a imajući u vidu da će povećanje broja izvršilaca u okviru MUP-a Kantona Sarajevo i Uprave policije imati fiskalne efekte jer će biti potrebno osigurati dodatna sredstva za školovanje/obuku kadeta, sredstva za plaće, doprinose i naknade, kao i dodatna sredstva za opremanje novih policijskih službenika, potrebno je od odredbi člana 12. stav (5) Zakona o ublažavanju negativnih ekonomskih posljedica i uštedama u Kantonu Sarajevo, izuzeti MUP Kantona Sarajevo, te osigurati blagovremeno donošenje novog Pravilnika o unutrašnjoj organizaciji, kao i drugih podzakonskih akata koji će imati finansijski efekat na Budžet.

P R E M I J E R

Edin Forto

Dostaviti:

1. Predsjedavajući Skupštine Kantona Sarajevo,
2. Zamjenicima predsjedavajućeg Skupštine Kantona Sarajevo (3x),
3. Skupština Kantona Sarajevo,
4. Sekretar Skupštine Kantona Sarajevo,
5. Premijer Kantona Sarajevo,
6. Ministarstvo finansija Kantona Sarajevo,
7. Evidencija,
8. A r h i v a.



web: <http://vlada.ks.gov.ba>
e-mail: vlada@vlada.ks.gov.ba
Tel: + 387(0)33 562-068, 562-070
Fax: + 387(0)33 562-211
Sarajevo, Reisa Džemaludina Čauševića 1



